

Cadeirydd, Y Pwyllgor Plant, Pobl Ifanc, ac Addysg
Cadeirydd, Y Pwyllgor Iechyd a Gofal Cymdeithasol
Cadeirydd, Pwyllgor yr Economi, Masnach a Materion
Gwledig
Cadeirydd, Y Pwyllgor Newid Hinsawdd, yr
Amgylchedd a Seilwaith
Cadeirydd, Y Pwyllgor Cydraddoldeb a Chyfiawnder
Cymdeithasol
Cadeirydd, Y Pwyllgor Diwylliant, Cyfathrebu, y
Gymraeg, Chwaraeon a Chysylltiadau Rhyngwladol

16 Gorffennaf 2021

Annwyl Gadeiryddion pwyllgor

Gwaith craffu ariannol

Yn ein cyfarfod ar 8 Gorffennaf 2021, trafododd y Pwyllgor Cyllid (y Pwyllgor) y rhaglen ymgysylltu ar gyfer Cyllideb Ddrafft Llywodraeth Cymru sydd ar ddod a'n dull o graffu. Rwy'n ysgrifennu at holl Gadeiryddion y pwyllgorau pwnc i rannu ein syniadau.

Amserlen

Yn unol â'r Rheolau Sefydlog, mae'r Trefnydd wedi [ysgrifennu at y Pwyllgor Busnes](#) yn nodi y bydd y Gyllideb Ddrafft yn cael ei chyhoeddi ar 20 Rhagfyr 2021 ac y bydd cynnig y Gyllideb flynyddol yn cael ei drafod yn y Cyfarfod Llawn ar 8 Chwefror 2022.

Ymgynghorodd y [Pwyllgor Busnes](#) â ni ar yr amserlen arfaethedig. Fel y nodwyd yn llythyr y Trefnydd, mae Canghellor y Trysorlys wedi nodi ei fwriad i gynnal adolygiad cynhwysfawr aml-flwydd o wariant, sy'n golygu na fydd Llywodraeth Cymru yn gwybod ei setliad cyllidebol nes i'r adolygiad cynhwysfawr o wariant ddod i ben yn yr hydref.



Senedd Cymru

Bae Caerdydd, Caerdydd, CF99 1SN

✉ SeneddCyllid@senedd.cymru

☎ 0300 200 6565

Welsh Parliament

Cardiff Bay, Cardiff, CF99 1SN

✉ SeneddFinance@senedd.wales

☎ 0300 200 6565

Rwyf wedi [ysgrifennu at y Pwyllgor Busnes](#) i fynegi ein siom y bydd y Gyllideb Ddrafft yn cael ei chyhoeddi yn ystod toriad y Nadolig. Er ein bod yn deall bod yr amserlen arfaethedig oherwydd amseriad adolygiad cynhwysfawr o wariant Llywodraeth y DU, hon fydd y drydedd flwyddyn yn olynol i'r amserlen arfaethedig leihau'r amser sydd ar gael i'r Senedd wneud gwaith craffu.

Y prif feysydd craffu ar y gyllideb

Mae'r Pwyllgor wedi cytuno i barhau â'r dull a ddefnyddiwyd yn Seneddau'r gorffennol, sy'n canolbwyntio ar bedair egwyddor gwaith craffu ariannol, sef: fforddiadwyedd, blaenoriaethu, gwerth am arian a phroses. Yr egwyddorion yw:

- **Fforddiadwyedd** - edrych ar y darlun mawr o ran cyfanswm y refeniw a gwariant, ac a oes cydbwysedd priodol rhyngddynt;
- **Blaenoriaethu** - a yw'r dyraniadau wedi'u rhannu rhwng sectorau/rhaglenni gwahanol mewn ffordd gydlynol y gellir ei chyfiawnhau;
- **Gwerth am arian** - yn y bôn, a yw cyrff cyhoeddus yn gwario eu dyraniadau'n dda - darbodusrwydd, effeithlonrwydd ac effeithiolrwydd (h.y. canlyniadau);
- **Prosesau'r gyllideb** - a ydynt yn effeithiol ac yn hygyrch ac a oes integreiddio rhwng cynlluniau corfforaethol a chynlluniau gwasanaeth, a rheolaeth perfformiad a rheolaeth ariannol.

Byddai'r Pwyllgor yn ddiolchgar pe bai eich gwaith craffu ar y gyllideb yn dilyn yr egwyddorion hyn.

Y dull o ran ymgysylltu

Bydd y Pwyllgor yn trafod ei ddull o ran ymgysylltu â'r Gyllideb Ddrafft ddechrau tymor yr hydref. Hoffem i'r ymgysylltiad hwn ategu a llywio gwaith y pwyllgorau polisi. Byddwn yn croesawu trafod hyn yn unigol â'r Cadeiryddion, neu yn Fforwm y Cadeiryddion.

Yn dilyn yr arfer mewn Seneddau blaenorol, mae'r Pwyllgor yn fodlon cynnal ymgynghoriad ar ran yr holl bwyllgorau. O gofio'r amserlen arfaethedig, rydym o'r farn mai cyhoeddi ein hymgyngghoriad ddechrau tymor yr hydref fyddai fwyaf addas.

Bydd Clerc y Pwyllgor Cyllid yn hysbysu eich clercod pwyllgor pan fydd yr ymgynghoriad wedi'i gyhoeddi a byddwn yn gwerthfawrogi eich help i hyrwyddo'r ymgynghoriad drwy eich adnoddau cyfathrebu eich hunan i annog cynulleidfa ehangach ac ymgysylltu â hi. Newidiodd y darpariaethau o ran adrodd gan bwyllgorau polisi yn 2017, ac rydych bellach yn gallu adrodd yn eich rhinwedd eich hunan (os dymunwch), a gall eich adroddiadau gael eu defnyddio fel dogfen ategol i'r ddadl ar y Gyllideb Ddrafft.

Dadl blaenoriaethau dan arweiniad y Pwyllgor Cyllid



Argymhellodd Pwyllgor Cyllid y Bumed Senedd y dylai Pwyllgor Cyllid yn y dyfodol gynnal dadl flynyddol ar flaenoriaethau gwariant Llywodraeth Cymru er mwyn rhoi cyfle i'r Aelodau drafod y blaenoriaethau gwariant, a dylanwadu arnynt o bosibl, cyn i'r Gyllideb Ddrafft gael ei chyhoeddi.

Eleni, trefnodd Llywodraeth Cymru ei dadl ei hun ynghylch *Paratoi'r Gyllideb: Blaenoriaethau ar gyfer 2022-23*, a gynhaliwyd ddydd Mawrth 13 Gorffennaf. Ysgrifennodd y Pwyllgor at y Gweinidog Cyllid a'r Pwyllgor Busnes i geisio cytundeb y bydd hon, yn y dyfodol, yn ddadl dan arweiniad y Pwyllgor Cyllid a gynhelir bob blwyddyn cyn toriad yr haf, y mae'r Gweinidog a'r Pwyllgor Busnes wedi cytuno iddi. Yn y blynyddoedd i ddod, rydym yn gobeithio cynnal ymarfer ymgysylltu â'r cyhoedd i lywio'r ddadl hon, a byddwn yn croesawu eich syniadau ynghylch sut y gall y pwyllgorau sy'n craffu ar y Gyllideb Ddrafft weithio gyda'i gilydd i gasglu barn y cyhoedd am yr hyn y mae'n teimlo y dylai blaenoriaethau gwariant Llywodraeth Cymru fod.

Gwaith craffu ariannol ar ddeddfwriaeth

Swyddogaeth graidd y Pwyllgor yw gwneud gwaith craffu ariannol ar Lywodraeth Cymru a chyrrff cyhoeddus cysylltiedig. Fodd bynnag, dylid cynnwys gwaith craffu ariannol yn y gwaith craffu y mae'r holl bwyllgorau'n ei wneud. Erbyn hyn, mae'r amser sydd ar gael i'r Pwyllgor yn gyfyngedig ac mae ganddo lawer o rwymedigaethau statudol i'w cyflawni. Felly, rydym wedi cytuno i drafod pob Bil a gyflwynir i'r Senedd yn gychwynnol er mwyn penderfynu a fyddwn yn craffu ar oblygiadau ariannol Bil, gan ddibynnu ar lefelau'r costau a'r tryloywder a gynhwysir yn yr Asesiad Effaith Rheoleiddiol. Os byddwn yn penderfynu peidio â gwneud gwaith craffu ariannol ar Fil penodol, byddwn yn ysgrifennu at y pwyllgor craffu cyfnod un perthnasol i nodi pwyntiau o ddiddordeb y gall fod angen i'r Pwyllgor eu trafod wrth adrodd ar egwyddorion cyffredinol y Bil.

Gan mai dyma ddechrau Senedd newydd, gobeithio y gallwn achub ar y cyfle i archwilio ffyrdd o weithio ar y cyd â phwyllgorau eraill i sicrhau'r gwaith craffu ariannol mwyaf effeithiol ar Lywodraeth Cymru. Hoffwn awgrymu ein bod yn trafod hyn yn fanylach yng nghyfarfod Fforwm y Cadeiryddion.

Os oes gennych gwestiynau am unrhyw agwedd ar broses y Gyllideb Ddrafft, mae croeso i chi gysylltu â mi neu Bethan Davies, Clerc y Pwyllgor Cyllid, drwy ffonio 0300 200 6372 neu anfon e-bost i seneddcyllid@senedd.cymru.

Yn gywir





Peredur Owen Griffiths AS
Cadeirydd y Pwyllgor Cyllid

Croesewir gohebiaeth yn Gymraeg neu Saesneg.
We welcome correspondence in Welsh or English.

